

'una tacau miaa aravari

1 aracan usupatu muna cenana miana, 'una mesua niarisinatua cau
2 Huran(荷蘭), 'esi na Namasia cau mesua ia, 'inmamia cau Kanakanavu. sua
3 niarisinatua Nakasayana ia “簡仔霧” kisun. sua Kanakanavu tamna
4 ngaca'u, masiraru kara niaranai nesi? makai ka'anu. kacaua cu mamarang
5 tumatuturu kitana, miana nimon kita na 'unai Nacunga. nakai noo kesoni
6 pa, 'esi nanu sua Nacunga? 'inmamia makasi, 'esi na tararakaua taniaru
7 misee. sua makasia kari ia, 'esi na kangangaan mamarang tamna cupungu.
8 mesua na to'unaa isua, niarakacaua cu cau cucumeni. makai kani 'esi
9 cu 'atipian sua siacuvuru. maruaru cu tuni arakanua marukurapu. noo tiain
10 arakanu ia, tia cu mukusa araceni, manasi 'una araa marukurapu. 'una
11 makaan, cani cupungana arakukunu arakanu, makai miana marivici tacau
12 tia 'uma'anupu. mukusa araceni koo pa tinukusaa miana. mon na taira
13 miaranau tatiara. 'una ucani tacau kamanumanu tamtitu. miaa tarasangai cu
14 arakanu, tacau cina mataa tamtitu, ariviciun kavangvang pui'i tanasa.
15 nguai sua to'unaa mesua 'unai Nacunga kisun. nakai sua tacau cina mataa
16 tamtitu, takacicini pui'i na tino'unaa kamanumanu. cani cupungana isua,
17 mukusa 'inia mapui'i marivici tanasa. nakai, maka'una pa tacau manguru.

18 makasua pupui'i makatumuru cu. cani cupungana isua pacupungu cu,
19 manasu 'esi 'apaica tacau sumasakiri tumatuturu kitana. makasuin kipapa
20 kita tacau aravari 'inia misee cu. makasua cu, cau cucumeni marivici cu cani
21 pininga aravari 'inia. niarakacaua cu cau, tuisua cu tanasun tatia. patanganai
22 Na'usurana kisun sua 'unai nesi. sua nguain tamna 'imi ia, paira
23 kani 'una 'uvu, sii tantaniara 'una cau 'esi 'inia matu'apuru tia po'ucipi.
24 kakangca 'inia makacumuru cu sua 'uvu.
25 sua 'una isi 'unai Na'usurana ia, nguai sua to'unaa Kanakanavu masini
26 Namasia, nganai Nakasayana ia “藤芭山” kisun. noo muciri kita na
27 Namasia tamna pipiningi ia, tarakusa na Nangisaru tamna cara, 'una tarupu
28 cimuru, nguai isua sua Na'usurana. nanmarua nanamu mita 'una makasi, sua
29 cimuru isua ia, Kanakanavu tamna “tamua cimuru” kisun. sua 'una
30 isi, 'una kangvang niarisinatua na Ripun citai tamna sinatu.

31

(文章大意 僅供參考) ※字數限 200 字

遷徙傳說中的獵狗

1	近四百年前，那瑪夏區的住民當時稱為「簡仔霧」。據稱以前是住	15
2	在 Nacunga 之地，太陽出現的東方，這是長輩們共同的記憶。當時聚落	16
3	愈來愈多，形成生活壓力，獵物逐漸減少。有次，一個家族性的集體狩	17
4	獵，其中有一隻母狗生了幼狗，狩獵結束後將母狗和幼狗帶回 Nacunga	18
5	的家。但是，母狗卻帶著幼狗跑到出生地，這可能是獵狗的啟示吧，就	19
6	搬過去住形成一個大聚落 Na'usurana，意指常有濃煙的地方。Na'usurana	20
7	就是「藤芭山」的周邊，在那瑪夏區室外抬頭，就可以看到那座山。	21
8		22
9		23
10		24
11		25
12		26
13		27
14		28

29

30

31

32

33

34

35

36

37

38

39

40